

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ia riro te tamataraa o to outou faaroo, o tei rahi roa te maitai i to te auro moe noa nei, tamata noâ i te auahi, ei haa-maitai, e ei tura, e ei maitai, i te faraa mai o Iesu Mesia ra.” Petero I, 1: 7.

Nu. 5.

10 Febuare, 1912.

Mat. 5.

Te Taeraa Piti Mai o te Mesia ra.

(TUATIRAA.)

I TE avae ra i Tenuare, ua faatiahia te tahi mau mea e tupu e tia'i hou te Mesia e tae mai ai. I taua vea ra ua neneihia te hoê parau ta Ioane pîpî here i ite, mai tei papaihia i Apokalupo i te pene 14 e te irava 6 e te 7. Ua tae mai anei taua melahi ra? Te na ô mai nei te mau haapaoraa te vai nei, aita â ratou i ite i taua melahi ra. E homa e, tera mai ta matou parau ia outou na, o te taio i teie nei parau, oia mau, ua tae mai te melahi ta Ioane i hi'o ra, e ua afaihia mai te Evanelia e tia i te vairaa ra, e o teie hoi te tumu i haere mai ai matou nei, oia hoi e pororaa'tu i taua Evanelia, ia tupu-mau-hia te parau e, “E parau-haere-hia te Evanelia nei e ati noa” e teie nei ao, ia ite te fenua atoa: o te hope ihora ia te reira ra.” Mataio 24: 14.

Te parahi noa ra te hoê taata apî, o Iosepha Semita te i'oa, i te pae i te hitia o te râ i te fenua ra o Amerika. E taata haapii-ore-hia oia i te mau parau paari o teie nei ao, area râ e taata maiti-mau-hia oia e te Atua, ei peropheta, e

ei farii i te mau parau heheu no te ra'i mai. Zekaria 24: 5. E tae a'era i te rui i te 21 no Setepa, i te matahiti 1823, i pure ai Iosepha, e ua fâ maira te hoê melahi a te Fatu ia'na i roto i to'na piha taotoraa. Ua vehîhia taua melahi a te Fatu ra i te maramarama anaana roa, a faaea'i oia i roto i te piha ra. Ua parau maira te melahi ia Iosepha, na ô maira:

“E vea vau no ô mai i te Atua ra, e o Moroni to'u i'oa. I tonohia mai na vau ia faaite atu ia oe (ia Iosepha) i te mau api auro e vai nei, i huna-ê-hia na e to'u iho rima. O te papaa parau ia, tei ootihia i nia i taua mau api ra, no te feia tahito tei parahi i nia i teie nei fenua i Amerika nei, e ua papai-atoa-hia i roto i taua papaa parau ra, te i'o te Evanelia Mure Ore ta te Mesia iho i haapii atu ia ratou. E feia maitatai ratou, e te herehia mai e te Atua i te tahi mau tau, i muri a'era râ, ua faarue roa ratou i te parau a te Atua, e i taua tau ra ua haamou-roa-hia te tahi pae o ratou.”

Mai tei au i te parau i papaihia i te avae ra i Tenuare, i reira te tahi atoa vea i te taeraa mai, no ô mai i te Atua e tia'i. Ua tohuhia ê na e te Peropheta ra e Malaki, te taeraa mai ia o te hoê vea, ei haamaitai i te e'a i mua i te Mesia ra. I te pene toru e te irava hoê, i na ô mai ai te taio-raa ra: “E tono vau i tau vea, e na'na e haamaitai i te e'a i mua ia'u ra: e te Fatu ta outou e imi na, o te tae vave mai ia i to'na ra hiero, te vea te faufaa ta outou i oaoa na: inaha, o te tae mai ia, te parau maira Iehova sabaota ra.”

Te mana'o nei te mau taata e rave rahi e, e no to te Mesia taeraa mai i te matamua, teie parau a Malaki ra. Na roto râ i te irava piti te haapapuraa e, e no te taeraa piti mai ia o te Mesia teie parau.

“E tia râ ia vai ra ia faaoromai ia tae i te mahana e haere mai ai oia ra? e o vai te mau ia fa mai oia ra? e au hoi oia i te auahi a te tamâ moni ra, e mai te pua a te tamâ ahu ra.” Malaki 3: 2.

Ua papai-atoa-hia e te Peropheta Malaki e: “E tono na

vau i te peropheta ra ia Elia ia outou na, a tae atu ai i tana mahana rahi mātā'u o Iehova ra: 6 ia faafariu oia i te aau o te mau metua e te tamarīi, e te aau o te tamarīi e to ratou mau metua, o te haere mai hoi au, e o te tairi i te fenua nei i te ino." Malaki 4: 5-6.

Te faaite atoa'tu nei matou ia outou e, e ua tae atoa mai te peropheta ra o Elia. E na'na i faaite mai te mau ravea ia faafariu i te aau o te mau metua i te tamarīi, e te aau o te mau tamarīi i te mau metua ra. Tei te matahiti 1836 to'na taeraa mai i te hiero i Ketelani.

E au mau hoa o Te Heheuraa Apî nei, o te taio i teie nei parau, a farii mai outou, no te mea e parau mau roa e te haavare ore; o tei vahavaha e tei faaino ra, ua tupu ia te mau parau ta te mau peropheta i faaite mai: "A hi'o na outou, e te feia e vahavaha, a maere atu, e a pohe atu; e ohipa hoi au i te hoê ohipa i to outou na anotau, e ohipa ra, parau noa'tu te taata ia outou na, e ore roa outou e faaroo." Ohipa 13: 41.—FARANI FULUMARE.

E Tauī Maitai.

I ROTO i te hoê putuputuraa rahi patoiraa inu ava, ua faaite mai i te mau taata, te tahi i te tahi i to ratou mau mana'o. Te tahi taata, e tiaa apî to'na. Tera mai ta'na parau: "E hoê hebedoma i muri a'e i to'u haapaeraa i te ava, ua farerei au i te tahi hoa tabito no'u, e ua na ô maira oia: 'E hoa, e tiaa maitai tera no oe.' Ua na ô atura vau: Oia mau, e teie hoi, na te hoê taata hoo ava i horoa mai no'u. Ua na ô maira to'u hoa e: 'E taata horoa maitai ia tana taata hoo ava.' Ua na ô atura vau e: Oia mau, ua faaau râ maua i te hoê faufaa, ia tapea oia i ta'na ava, e ia tapea vau i ta'u moni. Na ta'u moni i hoo i teie tiaa maitai. Ua noaa mai ia te maitai ia'u, e te mana'o nei hoi au e, e tapea vau i tana maitai ra."—MAITIHA.

HISTORIAN'S OFFICE

Church of Jesus Christ of Latter-day Saints

Te Parau Tuatapapa no
Iosepha Semita.

(TUATIRAA.)

PENE XVII.

MATAHITI 1833.

Ua tarahu te Feia Mo'a i Missouri i na haapii ture toomaha, ei paruru ia ratou. Te hamani-ino-raa-hia o te Feia Mo'a i te amaa i parauhia ra o Belu Rahi. Te aroraa. Ua haavarehia te Feia Mo'a, e ua horoa'tu i ta ratou mau mauhaa tama'i i te enemi.

U A haapao te Feia Mo'a i te mataeinaa ra, ia laketoni, i tei parauhia mai e te tavana rahi, e ua tarahu ratou i na haapii ture toomaha, oia hoi, o Wood, Reese, Doniphan, e o Atchison, ei paruru ia ratou i taua tau ahoaho rahi, e ua aufau atu ia ratou hoê tausani dara no ta ratou ohipa. E e mea tia tei ravehia e ratou, no te mea ua imi ratou i te ravea ia faaorehia to ratou peapea rahi na roto i te ture fenua ra, e ua riro te reira ei ite i te feia i Missouri, ua tia roa tei ravehia e ratou.

E faaroo a'era te enemi i te parau apî, ua tarahu te Feia Mo'a i na haapii ture ei tauturu ia ratou, ua tupu to ratou riri i te rahiraa, e ua haaputuputu mai ratou, i reira ua haere atura i te amaa i parauhia Belu Rahi. E tae atura ratou i reira, ua haamata ihora i te hamani ino i te Feia Mo'a, e ua haapararî i te mau fare e rave rahi, e ua parau ino, e ua tuhi i te mau taeae e te mau tuahine, area te mau tane ra, ua haruhia e ua tairihia i te raau, e ua tapuni haere ratou. Ia poipoi a'era, ua ho'i faahou mai ratou i to ratou ra mau fare, ua haapararîhia, e ua ino roa. Ei reira ua tupu to ratou auê, e te oto i te rahiraa. Ua roohia ratou i te ati toetoe, no te mea, o te haamataraa o te tau vero te reira. E muri a'e i te reira, ua tomo pinepine te enemi i

roto i te mau fare, e ua tiahi ê ratou i te mau taeae e te mau tuahine, tei pohe i te mai, tei ruhiruhia e te mau tamarîi i rapae i roto i te toetoe. Aita roa ratou i aroha noa'tu i te Feia Mo'a o te Ekalesia. Ia ore te enemy i ô i roto i te fare, ua taora ratou i te mau haamaramarama fare i te ofai, ei tamataraa ia haapararî i tei roto i te fare. Eaha te Feia Mo'a i hamani-ino-hia'i mai te reira te huru? E ere anei no te mea ua "opua ratou e haapao i te paieti ei roto â i te Mesia ra ia Iesu?" Te reira ia; aita'tu ia tumu.

I te hoê no Novema i te po, ua haamata te enemy i te hamani-ino i te Feia Mo'a i roto i te oire Inidipenideni. E i reira ua haapararî noa ratou i te mau fare e rave rahi no te mau taeae. Ua haapararî te tahi pŭpŭ enemy i na opani e toru no te fare toa no Gilbert e Whitney, e ua eiâ ratou i te mau tao'a hinaarohia, e te mau tao'a toe e rave rahi, ua taorahia te reira e ratou i nia i te purumu.

A rave noa'i te enemy i taua ohipa ino ra, ua tae i reira te hoê pŭpŭ taeae ei faaore i taua ohipa eiâraa, e ia itehia ratou e te enemy, ua horo ratou, area te hoê no ratou, o Richard McCarty to'na i'oa, ua haruhia e te mau taeae, e ua aratai ratou ia'na i mua i aro o te hoê taata mana, o Samuela Weston te i'oa, ia haavâhia, teie râ, aita roa oia i haavâ ia'na, area ua faatiamâ-roa-hia e ua tuuhia e a'na. E mea tia ore roa to'na tuuraahia, no te mea ua haru te mau taeae ia'na, a eiâ noa'i oia i ta ratou tao'a.

E ao a'era ua faarue te Feia Mo'a i te oire Inidipenideni, e ua haere ratou i rapae i te fenua papu, e i reira ua faatia i to ratou mau puhapa ei parahiraa no ratou. A reva atu ai te Feia Mo'a no te oire ra Inidipenideni, ua haere faahou te enemy i te Amaa Ekalesia Belu Rahi, ia hamani ino i te Ekalesia. Te pohe ra te hoê taeae i te ma'i, o Davida Bennet to'na i'oa, e te vai noa ra oia i nia i te roi. Ua tomo te enemy i roto i to'na fare, e ua haru ratou ia'na, tairi i te raau ia fatata roa i te pohe, e i reira ua pupuhi ratou ia'na,

tano ihora to'na upoo, aita râ i pohe roa, ua ora.

Ei taua po iho â, ua haaparuparuhia te hoê no te enemi, i mana'ohia na to'na iho mau taata i haaparuparu. Ia ite te enemi i te reira, ua tupu to ratou riri i te rahiraa, e ua parau ratou ma te tapu, e riro te mahana Monere i muri e mahana toto rahi.

E tae a'era i taua mahana ra, ua tae mai te hoê nuu no te enemi ia hamani ino i te Ekalesia. Ua farerei ratou i te hoê pŭpŭ no te mau taeae, e i reira ua haamata te aroraa, aita râ e maoro, ua fati te enemi, horo ê atura. I roto i taua tama'i, ua pohe roa toopiti no te enemi, e ua puta na taeae toopiti, oia hoi, o Anederea Barber e o Philo Dibble. Ua ora o Philo Dibble, area o Anederea Barber, ua pohe roa ia, e ua riro oia te taeae matamua i roto i teie nei Ekalesia i taparahihia e te enemi no te faaroo ia Iesu Mesia. Ua horoa noa oia i to'na iho ora ei tusia no to'na mau taeae, e aita roa e taata aroha ê atu i te reira; area na enemi hamani ino ua pohe raua na roto i te tamataraa i te taparahi i te Feia Mo'a. E tae atura te mau taeae i pihaiiho i to raua tau tino pohe i nia i te fenua, ua ite te mau taeae i te tino no te tahi, o Hugh Brazeale to'na i'oa, e ua parau ê na oia e, "Ia tau-turuhia vau e na hoa na'u hoê ahuru, e haere noa vau i roto i te toto e tae noa'tu i to'u nei na turi i te hohonu, ia ore vau ia tiahi ê atu te mau Moromona no te mau mataeinaa ra ia Iaketoni." E inaha to'na hopea ra, aita roa i tupu tei tohuhia e a'na. E i muri iho i taua aroraa ra, ua haaparare-ê-hia te parau apî e te enemi, ua riro te oire ra o Inidipenideni i te mau Moromona. No reira ua tiarepuhia te enemi, i te mau vahi i fatata, e taua parau ra, e ua haaputuputu ratou i te oire Inidipenideni. E i reira ua haru ratou i te taeae ra o Sidney Gilbert e te tahi atu â mau taeae, no te mea e, ua rave ratou i te eiâ ra o McCarty, a eiâ noa'i oia i to ratou tao'a i na mahana rii i mua a'e. Ua parihia ratou e te enemi i te hara taparahi taata, e ua arataihia ratou i mua i

te aro o te haavâ. A haavâ-noa-hia'i te mau taeae, ua faa-ino e ua tuhi te enemî ia ratou; e i taua po iho â, ua tuuhia te mau taeae i roto i te fare tapearaa ia ore ratou ia hamani-ino-hia, e ao a'era ua tuuhia i rapae ma te tiamâ.

I te 5 no Novema, ua faariro te tavana tauturu no Misouri, o Boggs to'na i'oa, i te enemî, ei nuu tama'i i raro a'e i te raatira o Colonel Pitcher, e enemî rahi oia no te Ekalesia. E ua titau oia i te mau mauhaa tama'i a te Feia Mo'a, e ua horoa'tu ratou i ta ratou mau mauhaa tama'i e hope roa'e. E i muri a'e i te reira, ua faaue oia i te Ekalesia ia faarue ratou i te mataeinaa ra ia Iaketoni, e ia haere ê atu. E teie â te tahi tauraa na'na ra, oia hoi, ia arataihia te mau taeae, tei roto i te aroraa i te mahana i mua a'e, ia haavâhia ratou i te hara taparahi taata. Ua haapao te Feia Mo'a i te faa-neraa a te tavana tauturu, e ua horoa'tu i ta ratou mau mauhaa tama'i ia'na, no te mea ua parau mai oia ia ratou, ia na reira ratou i te haapao, e titau atoa oia i te mau mauhaa tama'i no to'na iho mau taata. Teie râ, ua haavarehia te Feia Mo'a e a'na, ei reira ua iteahia to'na huru mau, oia hoi e taata haavare, hamani ino e e taparahi taata hoi. Ua faaoromai maite te Feia Mo'a i to ratou hamani-ino-raa-hia, no te mea ua faaroo ratou e, e huru maitai a'e ia hamani-ino-hia, i te hamani ino atu, mai tei parauhia mai e te Mesia ra, a na ô mai ai ra e: "E ao to tei hamani-ino-hia i te parau-tia ra; no ratou hoi te basileia ra o te ao."

—VILIAMU SETEMILA.

(E tuatihia mai teie parau.)

"I haere anei outou ma te hapa ore i mua i te Atua ra? E mai te mea ra e, ua tipapahia mai nei outou ia pohe i teie nei taima, ua tia anei ia outou ia parau i roto ia outou iho e, i navai to outou ra haehaa? Ua tamâhia e' ua faateateahia to outou ra ahu i te toto o te Mesia, o te tae mai e faaora i to'na ra mau taata i ta ratou mau hara?" Buka a Moromona; Alama 5: 27.

Te Muru o te Tatarahapa.

(TUATIRAA.) *manutae**Tapao Piti no te Tatarahapa: Hinan*

TE fa'i atu nei te tahi pae taata i ta ratou mau hara, mai te oto ore ia ratou, ua fa'i noa i ta ratou mau hara, mai te mea ra e, ua mauruuru roa i taua mau hara ra. A faaite-noa-hia'tu i ta ratou mau hara, tei faatiahia e ratou i ta ratou ihora mau hara i te otohe i te tahi otoheraa. O tei oto mau i ta'na mau hara, ua rave oia i te tapao piti no te tatarahapa. No reira ua oaoa Paulo i te Feia Mo'a i Korinetia i oto ma te tatarahapa, e ua au hoi to ratou oto i te Atua ra (Kor. Piti 7: 9-10), ua ite oia e, o te oto e au i te Atua ra, e faatupu ia i te tatarahapa e tae noa'tu i te ora. O tei ore e faatupu i te oto e au i te Atua ra, aita e tia ia parauhia e, ua tatarahapa.

Tapao Toru no te Tatarahapa: Ihi Teianau

Tera ia, ia fariu ê atu tei rave hara i ta ratou mau hara e tia'i, e ia au to ratou haerea i te ora apî. E ore roa e tia ia tatarahapa, maori râ ia fa'i te taata i ta ratou iho mau hara, mai te faatupu i te oto ia ratou, area e mea faufaa ore, e te hotu ore, te reira mau mea ia ore ia faaoti-roa-hia na roto i te faarueraa i te mau hara. Ia rave pinepine te taata i te hara, ua mataro oia i te raveraa hara. Ia oto pinepine te taata i te hara, ua mätä'u i te otoraa hara, e te reira huru oto (faahu'a tatarahapa) o te oto ia o teie nei ao, o tei faatupu i te pohe. E au mau hoa here e, ia tatarahapahia te reira huru oto haavare e tia'i. Ua a'o atura Ioane Bapetizo i te ati Iuda o tei haere mai ia'na ra "i te pohe e fatata mai nei". Na ô atura: "A tuu mai na i te parau e au i te tatarahapa." E o tei ore i na reira, e tatarahapa haavare to ratou. E itea te tatarahapa mau na roto i na tapao e toru ra, oia hoi: 1. Ua ite te taata e, ua rave oia i te hara, e ua fa'i atu ia ratou. 2. Ua oto oia i te mea ua rave oia i te hara, e ua faatupu oia i te hinaaro ia pee atu i te Mesia ra.

3. E e faarue ê atu oia i ta'na mau hara, mai te faatupu i te mau mana'o tia, e te tatarahapa mau. E mai te mea ua hamani ino oia i te hoê noa'tu taata, e aore râ ua parau ino i te tahi, e haere tia'tura oia e faaore atu i te reira e tia'i, mai te opua papu roa e, eiaha roa ia na reira faahou.

Te Tatarahapa Mau: Taper

Mai te mea ua opua teirave i te hara, eiaha roa oia e rave faahou, no te mea e ofatiraa ia i te ture a te Atua, ua au roa ia parauhia e, ei tatarahapa mau te reira. Ua haapii papu o Paulo i te Ekalesia Korinetia i te huru o te tatarahapa mau. Ua na ô atura oia: "Te oaoa nei au, e ere râ no te mea i faaotohia outou, no te mea râ i oto outou ma te tatarahapa; i au hoi to outou oto i te Atua. * * O te oto hoi e au i te Atua ra, e faatupu ia i te tatarahapa e tae noa'tu i te ora; eita ia e tatarahapahia; area te oto o teie nei ao, e faatupu ia i te pohe." O te huru tatarahapa mau teie e aita'tu. Te oto e au i te Atua, e aratai atu i tei rave i te hara i te haapao maitai, e o te hotu mau te reira no te tatarahapa. Ua huna Petero i te Mesia, ua hamani ino Paulo i te mau pîpî a te Fatu ra, area i muri a'era, ua tatarahapa ihora raua, e ua oto hoi i ta raua i rave ra, i te oto e au i te Atua ra, e ua riro raua ei hi'oraa maitai no te huru tatarahapa mau. E ua riro raua ei na aito itoito rahi, rave puai i te ohipa a te Atua e tae noa'tu i te hopea ra.

Te Oto o Teie Nei Ao:

"Area te oto o teie nei ao, e faatupu ia i te pohe." O tei oto noa i te mau hara, tei ravehia e ratou, ma te tamau i te rave noa i taua mau hara ra, tei ia ratou te oto o teie nei ao o tei faatupu i te pohe. Teie te tatarahapa mau, oia hoi, te fariuraa mai, mai te mau ohipa iino, e te opuaraa mau no te aau ia rave i te mau mea tia e tae noa'tu i te hopea ra. E ia na reira tatou atoa e tia'i, ia noaa te ora mure ore i te vahi oaoaraa i haapaohia e te Atua no te feia parau-tia.

—VILIAMU SETEMILA.

Te Mau Parau Api.

III EI Calafonia te hoê raoro oni rahi roa, e teie to'na teiaha ia faitohia, oia hoi, 52 paunu.

Te hoê pūpū taata i te oire rahi i Niu Ioka, ua faauta ratou i te hoê fare pureraa i nia iho i te hoê pahi, e ua fano atura i te tahi pae o te ava, e ua faatia-faahou-hia taua fare ra.

Mea toetoe rahi roa te fenua Amerika Apatoerau i teie nei. Ua riro te mau purumu ei pape paari, e no te pa'ia roa, ua hanere te taata i pēpē i te tino i te mairiraa i raro. E rave rahi te taata e te puua i pohe roa i te toetoe.

I te 9 no Tenuare, i tipae mai ai te pahi ra o Mariposa i Tahiti nei, e i te 13 no teie nei avae i ho'i atu ai. Tei nia iho ia'na to matou taene, o Moroni, e orometua to'na toroa, e te ho'i atu nei oia i to'na ihora fenua mau mai te maitai e te peapea ore.

Ua tupu te hoê ma'i i te oire ra o Oregona, i Amerika, i nia i te puahorofenua, e te puatoro, e te mamoe. E ua parauhia taua ma'i ra e, e ma'i ori haere noa, e ua ori haere noa ratou e tae noa'tu i te poheraa. E ua roaa atoa i te animara taua ma'i-ra, e aita roa'tu e ravea i iteahia i taua ma'i ra, no te mea e ma'i apî roa i te tupuraa.

Ua oti a'enei o Fareaya i te haavâhia, e teie te rahi o te utua i tuubhia mai i nia ia'na, e piti ahuru matahiti i te utua tapea. E hoê ahuru matahiti e hi'opoaraa ia ia'na, faautahia hoi oia i Karatoni. Ua ani atura te avota ra o Poro i te peresideni o te haavâraa rahi, e parururaa tau i taua utua ra, e hororaa tau, e ua faatiahia mai e toru mahana te maoro.

Tei te fenua ra o Eremani te hoê taata, o tei hamani i te hoê pupuhi, e tei roto i taua pupuhi ra te reva, oia hoi te mata'i. Aore e ofai; aore e pāura. Ei paruru no te mau taata ia hopu i raro i te mau i'a rarahi o te moana. E ua hopu te hoê taata i raro, e tei nia iho ia'na te hoê taura mata'i mai to te opupu te huru, e taua pupuhi atoa ra. E tae atura oia i raro roa, ua ite oia i te hoê mao, e ua pupuhihia, e ua pohe roa, e no reira e ohipa maitai roa e te maerehia.

Ua iteahia te hoê tamaiti, tei te 8 o to'na ra matahiti. I haamata ai oia i te taio i te mau buka paari roa o teie nei ao. E ia tae i te ahuru mā pae o to'na ra matahiti, ua papai oia i te hoê buka paari roa no te mau fetia, e i to ratou rahiraa, e to ratou mau i'oa, e te vahi e haerehia e ratou, e te avae i to'na haerea e to'na mairiraa. E na'na i faataa i te huru o te opape i te hutiraa i nia e te hutiraa i raro; e te mahana atoa, o tei ote i te miti, e ua riro ei ata, e muri a'e riro atura ei pape, etc.

Ua faarue roa te hau apî Tinito i to te Tinito taioraa mahana huru ê, e ua rave ratou i te hoê huru taioraa e au i to te mau fenua papaa.

Ua opani roa te hau Amerika i te hooraa i te absinthe, oia hoi te hoê a ava taero roa. Ua inu noa ra te tahi pae taata i Tahiti nei i taua ava taero roa. No te fenua Farani mai taua ava ra.

I te hoê oire iti i te hitia o te râ i Amerika, ua opani-roa-hia te taata, eiaha roa ratou e hoi atu i ta ratou mau hoa i te Matahiti Api, eiaha atoa ratou ia aroha rima i te taata. No te hoê ma'i ou'a te tumu ia opanihia'i te mau taata i te rave i taua mau peu ra.

Ua haafatata a'era te hoê pahi Beritani i te fenua Tripoli, ua pupuhi-hia oia e te hoê pahi manuâ Italia, ino atura taua pahi ra. Ua mana'o ihora te raatira no te pahi manuâ Italia e, e pahi Turekia taua pahi Beritani ra. Ua fa'i maira taua raatira ra i to'na hape.

E mea puai roa te patoiraa o te mau taata Turekia e to Arabia i te faehau Italia i te fenua Tripoli. Ua haru hoi Italia i te mau oire rarahi i tahatai, tei utarâ te peapea rahi. I te mahana Fanauraa, ua tupu te hoê aroraa rahi roa, e e mea rahi roa te taata tei pohe roa, e e rave rahi â hoi tei puta noa i te ofai pupuhi. Ua parauhia e 15,000 faehau Italia tei pohe mai te haamataraa mai o te tama'i.

Ia feruri maite te mana'o o te taata i te mau mea puai, ua mana'o ihora e, tei te mau manu rarahi te puai. E homa e, eiaha tatou e rû i te faatia i te reira. E hi'opoa atoa tatou i te huru o te mau manu nainai, e to ratou puai, e te huru o to ratou tino. A hi'o na tatou i te ro, e manu iti râ e te puai rahi, e te rave ohie roa ia afai i te hoê mea e 40 te taime i apitihia i to'na ihora teiaha ia faitohia. O te piti o te manu, oia hoi, te beetle, 112 te taime i apitihia i to'na ihora teiaha ia faitohia. Te toru o te manu, oia hoi, te vivi, e manu puai roa, e roaa ia'na e 60 maile i te hora hoê. E maitai ia'na ia faaea roa, mai te haere ore i te tahi pae e te tahi pae, mai te hauti ore o to'na tino, mai te mea ra e, tei nia oia i te hoê raau i te faaeearaa. Te maha o te manu, oia hoi, te meli o tei parauhia e debure. ua hamani oia i te ô faaraa i nia i te raau, i roto i te mato, e i roto i te tumu raau, e ia parahi ratou i roto i taua ô faaraa ra, aita roa'tu e mairi i raro. E faaaau tatou i teie nei ohipa i nia i te taata, ia mau te hoê taata i te hoê amaa raau, ehia ia taata e mau ia'na, e piti ia e aore ra e toru. Mai te mea ua faarahihia te puai e te tino o te ro, ia tae oia i te faito i te rahi i to te elephana, e tia noa ia'na ia afai haere i te hoê pahi rahi. Te pae o te manu, e tutua, e manu puai roa. Ia faarahihia to'na tino e to'na puai, ia au i to te puaahorofenua, e tia ia'na ia ou'a mai ia Tahiti atu nei e tae roa'tu Niu Zilani, etc.

I te 10 no Tenuare, i te hora hitu i te poipoi, ua pohe roa te vahine ra, o Tehara a Tekataha. E ua hunahia oia i Paurani i te 11 i te hora hitu i te poipoi.

Ua pohe roa te hoê taata tuiroo, o Charles Leauthem to'na i'oa. E taata ite maitai oia i te faatere i te pahi reva. E i te fenua ra o Farani to'na poheraa. Ua mairi mai oia no nia mai i to'na pahi reva.

Ua tupu te hoê ohipa maere i te fenua ra i Amerika. Ua-hoo te hoê vahine i te hoê avae mamoe i te makete, e ua afai oia i taua avae mamoe ra i te fare, e ua tunu oia ei maa na ratou. Ua mairi maira te hoê daimoni maitai roa i rapae. E ua parauhia e, e faufaa rahi roa tei taua daimoni ra, e teie te rahi o te moni i hoochia, 250 dara.

I te fenua ra o Amerika, ua haru te hoê mutoi i te hoê vahine ati Iuda. Teie te tumu i haruhia oia, no to'na haapeu maamaa. Ua haere oia i nia i te purumu e faarue atu i ta'na moni na te mau taata i haaputuputu mai. E vahine tao'a rahi taua vahine ra, e no to'na hinaaro ia veve oia a pohe atu ai, te tumu ia faarue ai oia i ta'na moni. Ua mana'o ihora oia e, ua tae mai to'na mahana hopea.

Ua pohe te taata ra o Dorence Atwater i San Francisco, California to'na poheraa, i te 28 no Novema, 1910. E ua ho'i maira ta'na vahine i Tahiti nei. E ua hamanihia te hoê menema nehenehe roa i Papara ei vai-raa no teie nei taata. Ua tae mai teie nei taata i Tahiti nei i te matamua, e tonitara to'na toroa, e ua rave oia i te ohipa o taua toroa ra e tae noa'tu i to'na ho'iraa'tu. E taata roo maitai oia, e e mea pinepine oia i Tahiti nei. E tae a'era i te avae Tenuare, ua faautahia mai taua tino o taua taata ra i Tahiti nei, na nia mai i te pahi auahi ra Tahiti. E ua tipae mai oia i te 22, e i te hora 5, i te ahiahi, ua putuputu maira te hoê naho'a rahi ra. E tae atura i te taime mau i haapaohia ra, ua faahorohia te hoê pereoo haehaa, e maha puaahorofenua, e ua faanehenehe i te mau huru raau o Tahiti nei. E ua haere maira na taata i haapaohia, ei afai i te afata o teie nei tino pohe. Ua rave ihora ratou i te afata o taua tino pohe ra, hopoi atura i nia i te pereoo. Ua hau roa ia i te nehenehe e te maitai, e ia tae i nia iho. Ua tae maira te orometua ra Tepomare, e ua haamatahia te himene, e oti a'era, pure ihora, faahorohia'tura.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.